

TRAIM LONG KISIM HALIVIM

Givim dispela pepa long ol lain bilong man, na lain bilong yu tu, na askim ol long helpim yu.

Painim ples we yu na ol pikinini bilong yu iken stap seif, sapos man ispak o kros tumas.

Askim pasta o pater long tokaut insait long lotu olsem pasin bilong paitim meri emi no stret, na askim em tu long toktok wantaim man bilong.

Askim lida long kommiuniti long tokaut long olgeta lain long kommiuniti olsem pasin bilong paitim meri emi no stret, na askim ol tu long toktok wantaim man bilong yu.

Askim ol narapela meri long sanap autsait long haus bilong yu na bikmaus, paitim sospen na semim man, taim emi paitim yu.

Kisim wanpela Priventiv Oda long Viles Kot o Distrik Kot, long tambuim man long paitim yu.

Ripotim man long polis. Emi no samting bilong famili tasol. Pasin pait emi brukim Lo.

Sapos yu no inap stap moa wantaim man, ol welfe lain inap helpim yu long givim Oda long man, long givim moni long sapotim yu na ol pikinini.

Leitana Nehan Women's Development Agency isave helpim meri sapos man ipaitim ol.

PAINIM HALIVIM NAU!

Sapos yumi no soim man olsem pasin bilong paitim meri em ino stret, em bai ino inap senis.

Yumi olgeta igat rait long stap fri long pasin pait.

EMI TAIM NAU LONG STOPIM PASIN PAITIM MERI

**PASIN PAITIM MERI ISAVE
BAGARAPIM HELT NA
SINDAUN BILONG FAMILI**

**SAPOS MAN BILONG YU I SAVE
PAITIM YU, EMI GUTPELA YU
PAINIM HALIVIM**

Pasin bilong paitim meri, emi ino save kamap wanpela taim tasol.

Sapos man bilong yu ibin paitim yu, em bai mekim gen, sapos ol narapela ino stopim em.

Kisim halivim nau, pastaim long hevi ikamap bikpela tumas.

**SAPOS MAN ISAVE PAITIM YU, EM BAI
DAUNIM HELT BILONG YU**

Pasin pait isave bagarapim bodi bilong yu, na em bai hat long yu long lukautim gut famili, na yu yet.

Sapos man ipaitim yu long het, em inap bagarapim kru bilong yu, o kamapim aipas o iau pas.

Bai yu prèt na wari, olsem na yu no inap hamamas o tingting stret.

**SAPOS MAN ISAVE PAITIM YU, EMI
SAVE GIVIM HEVI LONG OL PIKININI
TU**

Long ol famili we papa isave paitim mama, ol helt woka oli painimaut olsem helt bilong ol pikinini isave go daun, na oli no save gro gut.

Ol pikinini isave wari, oli no inap wok gut long skul, na ol inap paul na bihainim pasin nogut.

Pasin paitim meri isave skulim ol pikinini long pasin pait, na ol bai ting pasin bilong pait em iorat tasol.

Sapos yu gat bel, pait inap bagarapim bebi, na inap kamapim hevi long karim.

LEITANA NEHAN WOMEN'S
DEVELOPMENT AGENCY
PO Box 22, Buka, Autonomous
Region of Bougainville
Papua New Guinea
Phone/Fax: (675) 973 9062
Email:
leitananehan@daltron.com.pg

**SAPOS MAN ISAVE PAITIM YU, BAI
INAP BAGARAPIM FAMILI BILONG YU**

Pasin paitim meri isave brukim famili.

Sapos man bilong yu ifosim yu long koap, dispela inap kamapim pikinini klostu klostu, na daunim helt na strong bilong yu na ol pikinini.

Sapos man emi gat sik bilong koap na em ikoap wantaim yu, em bai givim sik long yu. Dispela inap pasim bel bilong yu olgeta.

Na sapos man emi gat sik AIDS binatang, emi inap givim long yu, na bebi tu inap kisim binatang bilong AIDS.

LO I TAMBUIM PASIN PAIT

Ol meri na man igat wankain rait aninit long Lo bilong PNG.

Kastom bilong baim braidprais emi no givim rait long man long paitim meri.